

巢氏病源

重刊巢氏諸病源候總論卷三十七

婦人雜病諸候

凡三十二論

風虛勞冷候

風虛勞冷者是人體虛勞而受於冷也夫人將攝順理則血氣調和風寒暑濕不能爲害若勞傷血氣便致虛損則風冷乘虛而干之或客於經絡或入於腹內其經絡得風冷則氣血冷澀不能自溫於肌膚也腹內得風冷則脾胃弱不消飲食也隨其所傷而變成病若大腸虛者則變下利若風冷入於子藏則令藏冷致使無兒若搏於血則血澀壅亦令經水不利斷絕不通

風邪驚悸候

風邪驚悸者是爲乘於心故也心藏神爲諸藏之主若血氣調和則心神安定若虛損則心神虛弱致風邪乘虛干之故驚而悸動不定也其驚悸不止則變恍惚而憂懼

虛汗候

人以水穀之精化爲血氣津液津液行於腠理若勞傷損動陽氣外虛腠理開血氣衰弱故津液洩越冷多汗也其虛汗不止則變短氣柴瘦而羸瘠也亦令血脈減損經水否澀甚者閉斷不通也

中風候

中風者虛風中於人也風是四時八方之氣常以冬至之日候其八方之風從其鄉來者主長養萬物若不從其鄉來名爲虛風則害萬物人體虛者則中之當時雖不卽發停在肌膚後或重傷於風前後重沓因體虛則發人府藏俞皆在背中風多從俞入隨所中之俞而發病若心中風但得偃臥不得傾側汗出若脣赤汗流者可治急灸心俞百壯若脣或青或白或黃或黑此是心壞爲水面目亭亭而時悚動皆不復可治五六日而死若肝中風踞坐不得低頭若繞兩目連額上色微有青者脣青而

面黃可治急灸肝俞百壯若大青黑面一黃一白者是肝已傷不可復治數日而死若脾中風踞而腹滿身通黃吐鹹水汗出者可治急灸脾俞百壯若手足青者不可復治腎中風踞而腰痛視脇左右未有黃色如餅糲大者可治急灸腎俞百壯若齒黃赤鬚髮直面土色不可復治肝中風側臥而胃滿短氣胃悶汗出視目下鼻上下兩邊下行至口色白可治急灸肺俞百壯若色黃爲肺已傷化爲血而不可復治其人當妄掇空自拈衣此亦數日而死

中風口噤候

中風口噤是體虛受風風入額頰夾口之筋也手三陽之筋結入於頷頰足陽明之筋上夾於口而風挾冷乘虛而入其筋則筋攣故引牙關急而口噤

角弓反張候

角弓反張是體虛受風風入諸陽之經也人陰陽經絡周環於身風邪乘虛入諸陽之經則腰背反折攣急如角弓之狀

偏風口喎候

偏風口喎是體虛受風風入於夾口之筋也足陽明之筋上夾於口其筋偏虛而風因乘之使其經筋偏急不調故令口喎僻

也

賊風偏枯候

賊風偏枯是體偏受風風客於半身也人有勞傷血氣半身偏虛者風乘虛入客爲偏風也其風邪入深真氣去邪氣留則爲偏枯此由血氣衰損爲風所客令血氣不相周榮於肌肉故令偏枯也

風眩候

風眩是體虛受風風入於腦也諸府藏之精皆上注於目其血氣與脈并上屬於腦循脈引於目系目系急故令眩也其眩不

止風邪甚者變癲倒爲癲疾

癲狂候

癲者卒發仆地吐涎沫口喎目急手足繚戾無所覺知良久乃甦狂者或言語倒錯或自高賢或罵詈不避親疏亦有自定之時皆由血氣虛受風邪所爲人稟陰陽之氣而生風邪入并於陰則爲癲入并於陽則爲狂陰之與陽更有虛有實隨其虛時爲邪所并則發故發癲又發狂又在胎之時其母卒大驚動精氣并居亦令子發癲此則小兒而發癲者是非關長因血氣虛損受風邪所爲又有五癲一曰陽癲二曰陰癲三曰風癲四曰

濕癩五曰勞癩此蓋隨其感處之由立名又有牛馬豬雞狗之癩皆死其癩發之時聲形狀似於牛馬等故以爲名也俗云病癩人忌食六畜之肉食者癩發之狀皆悉象之

風瘙痒候

風瘙痒者是體虛受風風入腠理與血氣相搏而俱往來在於皮膚之間邪氣微不能衝擊爲痛故但瘙痒也

風蠱候

風蠱者由體虛受風風在皮膚之間其狀淫淫躍躍若蠱物刺一身盡痛侵傷血氣動作如蠱毒之狀謂之風蠱



癰候

癰病是賊風入百脈傷五藏連注骨髓俱傷而發於外使眉睫墮落皮肉生瘡筋爛節斷語聲嘶破而毒風之變冷熱不同故腠理發癰形狀亦異

氣候

氣病是肺虛所爲肺主氣五藏六府皆稟氣於肺憂思恐怒居處飲食不節傷動肺氣者並成病其氣之病有虛有實其肺氣實謂之有餘則喘逆上氣其肺氣虛謂之不足則短乏少氣而有冷有熱熱則四肢煩熱也冷則手足逆冷

心痛候

心痛是藏虛受風風冷邪氣乘於心也其痛發有死者有不死
成癰者心爲諸藏主而藏神其正經不可傷傷之而痛者名爲
真心痛朝發夕死夕發朝死心之肢別絡爲風冷所乘而痛者
故痛發乍間乍甚而成癰也

心腹痛候

心腹痛者府藏虛弱風邪客於其間與真氣相擊故痛其痛隨
氣下上或上衝於心或下攻於腹故心腹痛

腹中痛候

腹痛者由藏府虛弱風冷邪氣乘之邪氣與正氣相擊則腹痛也

小腹痛候

小腹痛者此由胞絡之間宿有風冷搏於血氣停結小腹因風虛發動與血氣相擊故痛

月水不調候

婦人月水不調由勞傷氣血致體虛受風冷風冷之氣客於胞內傷衝脈任脈損手太陽少陰之經也衝任之脈皆起於胞內爲經絡之海手太陽小腸之經手少陰心之經此二經爲表裏

主上爲乳汁下爲月水然則月水是經絡之餘若冷熱調和則衝脈任脈氣盛太陽少陰所主之血宣流以時而下若寒溫乖適經脈則虛有風冷乘之邪搏於血或寒或溫寒則血結溫則血消故月水乍多乍少爲不調也診其脾脈沈沈而喘浮之而虛若腸脹煩滿胃中有熱不嗜食食不化大便難四支苦痺時不仁得之房內月事不來來而併又少陰脈澀則血不來此爲居經三月一來又脈微血氣俱虛年少者亡血之脈也乳子下利爲可不調者此爲居經亦三月一來又經水一月再來者經來時其脈欲自如常而反微者不利不汗出者其經二月必來

養生方云病憂恚泣哭以令陰陽結氣不和故令月水時少時多內熱苦渴色惡體肌枯身重

月水不利候

婦人月水不利者由勞傷血氣致令體虛而受風冷風冷客於胞內損傷衝任之脈手太陽少陰之經故也衝脈任脈之海皆起於胞內手太陽小腸之經也手少陰心之經也此二經爲表裏主下爲月水風冷客於經絡搏於血氣血得冷則壅滯故令月水來不宣利也診其脈從寸口邪入上者名曰解脈來至狀如琴絃苦小腹痛經月不利孔竅生瘡又左手關上脈足厥陰

經也沈爲陰陰虛者主月經不利腰腹痛尺脈滑血氣實經絕不利又脈左手尺來而斷絕者月水不利也又脈寸關調如故而尺脈絕而不至者月經不利當患小腹引腰絞痛氣積聚上又胷脇

月水來腹痛候

婦人月水來腹痛者由勞傷血氣以致體虛受風冷之氣客於胞絡損衝任之脈手太陽少陰之經衝脈任脈皆起於胞內爲經脈之海也手太陽小腸之經手少陰心之經也此二經共爲表裏主下爲月水其經血虛受風冷故月水將下之際血氣動

於風冷風冷與血氣相擊故令痛也

月水不斷候

婦人月水不斷者由損傷經血衝脈任脈虛損故也衝任之脈爲經脈之海手太陽小腸之經也手少陰心之經也此二經爲表裏主下爲月水勞傷經脈衝任之氣虛損故不能制其經血故令月水不斷也凡月水不止而合陰陽冷氣上入藏令人身體面目痿黃亦令絕子不產也

月水不通候

婦人月水不通者由勞損血氣致令體虛受風冷風冷邪氣客

於胞內傷損衝任之脈并手太陽少陰之經致胞絡內絕血氣不通故也衝任之脈起於胞內爲經脈之海手太陽小腸之經也手少陰心之經也此二經爲表裏主下爲月水風冷傷其經血血性得溫則宜流得寒則澀閉旣爲冷所結搏血結在內故令月水不通 又云腸中鳴則月事不來病本於胃所以然者風冷干於胃氣胃氣虛不能分別水穀使津液不生血氣不成故也 又云醉以入房則內氣竭絕傷肝使月事衰少不來也所以爾者肝藏於血勞傷過度血氣枯竭於內也又先經唾血及吐血下血謂之脫血使血枯亦月事不來也又利血經水亦